

Í upphafi vil ég biðja fundarmenn að minnast Jónasar Ólafssonar fyrrverandi formanns FV, með augnablikspögn. En Jónas lést þann 27. apríl s.l. Jónas var tók virkan þátt í starfi FV sem fulltrúi Þingeyrarhrepps allt frá árinu 1976 fram að sameiningu sveitarfélaganna á norðanverðum Vestfjörðum árið 1996. Hann tók við formennsku í stjórn á 29. fjórðungþingi árið 1984 og gengdi henni í 4 ár.

En þá að skýrslu stjórnar.

Að loknu 60. fjórðungsþingi sem haldið var á Patreksfirði tóku við hefðbundin verkefni formanns og framkvæmdastjóra og fyrst á dagskrá var að koma á framfæri ályktunum þingsins við fjárlaganefnd á árlegum fundi með þeirri nefnd. Hafðist það í gegn að veitt var fjármagni í gerð kerfisáætlunar fyrir vestfirði og lokaáfangi í hringtengingu ljósleiðara um Djúp, en afdrif annarra stærri mála okkar, sem áhersla hefur verið lögð á undanfarin misseri, eru samgöngumálin, lagasetning um strandsvæðaskipulag eru að mestu leyti enn í vinnslu, skoðun eða undirbúningi ☺

Fyrsti fundur stjórnar eftir fjórðungsþing var haldinn í október, en alls voru haldnir 6 stjórnarfundir á tímabilinu, að jafnaði einu sinni í mánuði.

Á fyrsta fundi stjórnar eftir fjórðungsþingið var ákveðið að framkvæmdastjóri myndi gera könnun um framkvæmd 60. fjórðungsþings, en niðurstöður þeirrar könnunar voru svo kynntar stjórn á næsta fundi á eftir. Niðurstöður voru að mestu leyti afgerandi, 85% svarenda töldu að Fjórðungsþing hefði tekist mjög vel eða frekar vel. 85% svarenda töldu að málefnið sem fjallað var um hefðu verið skýr, en reyndar var það svo að þau 15% sem hér vantaði uppá voru ekki á þinginu og því varla marktækt, en þá er einfalt að túlka niðurstöðurnar þannig að almennt hafi verið ánægja með þingið.

Út úr könnuninni komu ábendingar um að skipulag hefði mátt vera betra og hefur að einhverju leyti verið brugðist við því, en um 77% töldu þó að skipulag hefði verið gott.

Einnig var spurt um tímasetningu á vor- og haustþingi. Afgerandi meirihluti taldi best að halda vorþing í byrjun maí, en aðeins skiptari skoðanir voru á því hvenær ætti að halda haustþingið, en örlitlu fleiri vildu þó að það yrði í byrjun september frekar en um miðjan september og við því hefur verið brugðist, enda haustþingið nú þegar verið bókað þann 2. september í Bjarnarfirði á ströndum. Langflestir töldu æskilegt að halda sameiginlegan kvöldverð sveitarstjórnarmanna og gesta í tengslum við haustþingið,

svokallað málefnaþing og yrði það þá nokkurs konar árshátíð sveitarstjórnarmanna á Vestfjörðum.

Þrátt fyrir að flestir teldu það æskilegt að hafa sameiginlegan kvöldverð með skemmtun á haustþingi, þá var ákveðið að bjóða einnig upp á kvöldverð og samverustund í tengslum við þennan fundardag. Enda ágætt að enda daginn saman og nýta þennan vettvang til skrafs og ráðagerða.

Á haustdögum sendu landshlutasamtök sveitarfélaga frá sér sameiginlega ályktun um nokkra málaflokka sem voru deigluð á þeim tíma, s.s. er varðaði skort á fjármagni í þjónustu við fatlað fólk, samning um sóknaráætlun og bætingu á fjármagni þar í, um samgöngumál og skort á fé í viðhald og þjónustu, óvissu í nýframkvæmdum, um almenningssamgöngur og ljósleiðaravæðingu landsins. En þess má geta að þeirri gjörð fylgdu auðvitað efasemdir um að einhverjir læsu yfir höfuð þessar ályktanir okkar. En það kom þó fljótlega á daginn að þetta var alveg örugglega að skila sér, a.m.k. kosti til þeirra sem þóttust vera skildir eftir útundan, því þegar við Aðalsteinn sóttum fund í heilbrigðisráðuneytinu í byrjun desember til að fylgja eftir ályktunum fjórðungspings, þá fengum við að heyra frá ráðherranum sjálfum að það væri ekki fallett að skilja útundan ef svo má segja. Honum hafði sem sagt ekki þótt það vera gáfulegt hjá okkur að beina ekki spjótum okkar líka að skorti á fé í heilbrigðismálin. Þarna kom það bersýnilega fram að ályktanir sem þessar væru dregnar upp á borðið þegar ráðuneytin væru að karpa sín á milli um aukið fé. Það vilja greinilega allir fá liðsauka í að afla viðbótarfjármuna fyrir sína málaflokka !

Í desember síðastliðinn kom út skýrsla byggðastofnunar um hagvöxt landshluta 2009-2013. En þar kom bersýnilega fram að fjórðungurinn stendur höllum fæti þegar kemur að mælingum á hagstærðum og fólksfækkun er viðvarandi yfir heildina tekið. Viðbrögð stjórnar við skýrslunni voru þau að kalla eftir sambærilegri vinnu og unnin var með norðvesturkjördæmi – í norðvesturnefndinni svokölluðu. Á síðustu vikum og mánuðum hefur málið verði unnið með þingmönnum kjördæmisins og kynnt fjármálaráðherra og þingmönnum stjórnarflokka. Til að fylgja eftir þeim viðræðum var svo ákveðið að setja í gang formlega beiðni til ríkisstjórnar Íslands um aðgerðir. Þessari málaleitan hefur verið vel tekið og þess er vænst að tillagan komist í ákveðinn farveg innan ríkisstjórnarinnar og vonandi mun ekki líða á löngu þar til nefnd verður skipuð til að fara markvisst í þessi mál. Ljóst er þó að ekki verði staðið að þessu með sambærilegum hætti og í vinnu norðvesturnefndarinnar, en lögð hefur verið áhersla á að farvegur sóknaráætlunar verði nýttur í þessu

sambandi og að vinnan geti svo mögulega verið staðfærð ef upp koma sambærilegar aðstæður. Við gerum ekki athugasemdir við það svo lengi sem að verkefnið fari af stað sem allra fyrst. Framkvæmdastjóri hefur þegar unnið drög að tillögum sem vinna má úr og voru þær samþykktar á fyrsta fundi samráðsvettvangs framkvæmdastjóranna.

Í byrjun ársins var komið að því að fylgja eftir nýjum samþykktum fjórðungssambandsins en þá var haldinn fyrsti samráðsfundur stjórnar með framkvæmdastjórum eða oddvitum sveitarfélaganna. Tveir slíkir fundir hafa nú verið haldnir og er það álit mitt að þetta sé til mikilla bóta fyrir samstarfið og verða menn án efa betur upplýstir um þau verkefni sem verið er að vinna að, auk þess sem stærri sameiginlegar ákvarðanir er varða hagsmunamál eru einfaldari í vinnslu.

Verkefnin sem unnið er að innan fjórðungssambandsins eru mörg og fjölbreytt. Töluverður þungi er enn í vinnu við sóknaráætlun og samráðsvettvangur sóknaráætlunar, var virkjaður enn á ný í byrjun árs. Það var svo að lokum fulltrúaráð þess vettvangs sem lagði blessun sína yfir þau 8 áhersluverkefni sem verða verkefni sóknaráætlunar á yfirstandandi ári og einhver þeirra eru reyndar til fleiri en eins árs.

Loks má geta þess til gamans að aðalsteinn kynnti okkur samantekt Creditinfo á fjölmiðlaumfjöllun um Fjórðungssambands Vestfirðinga á árinu 2015 og samanburð við árið 2014. Fram kom í þeirri samantekt að fjórðungssambandið er mest í umfjöllun fjölmiðla í samanburði við önnur landshlutasamtök.

Á vordögum skýrði ég stjórn og framkvæmdastjóra frá því að ég myndi ekki gefa kost á mér til áframhaldandi setu í stjórn fjórðungssambandsins, enda hef ég nú verið í þeirri stjórn í nærri 6 ár og hefur sá tími hefur verið með mestu ágætum. Mér þykir þó komið gott að sinni og kveð því þennan vettvang. Formannstímabil mitt hefur reyndar verið óvenju stutt, því að einungis eru um 20 mánuði frá þinginu á Þingeyri þar sem ég tók við formennsku. En þannig verður þetta hér eftir, fyrri kjörtímabil til stjórnar fjórðungssambandsins verður ávallt mun styttra en það síðara. Mitt síðasta verkefni var að fara ásamt Aðalsteini á fund umhverfis- og samgöngunefndar í liðinni viku til að ítreka enn og aftur þau mikilvægu málefni sem við teljum að þurfi að komast í farveg með samþykkt samgönguáætlunar, sem og auðvitað að leggja áherslu á það sem þyrfti að komast á dagskrá til viðbótar. Til marks um breytt vinnubrögð má geta þess að við fengum að þessu sinni að sitja í 2 klst. með nefndinni, ásamt

tveimur öðrum landshlutasamtökum, í stað þeirra klassísku 15-20 mín. sem venjulega eru gefnar.

Breytingar sem fráfarandi stjórn hefur staðið fyrir, bæði í BSvest er varðar breytingu á stjórnarskipan og vægi aðildarsveitarfélaga, sem og breytingar á samþykktum FV, tel ég að séu til mikilla bóta. Farsæl breyting sem þarf auðvitað að fá tíma til að sanna sig. Eins eru samráðsfundir stjórnar með framkvæmdastjórum eða oddvitum sveitarfélaganna afar mikilvægt skref í átt að aukinni samvinnu og bættu lýðræði innan okkar vettvangs☺

Ekki náðist að vinna í stefnumótun fjórðungssambandsins eins og ályktað var á síðasta fjórðungsþingi, einfaldlega vegna anna við önnur verkefni, en Aðalsteinn mun koma betur að því síðar hér í dag í hvaða farveg súa vinna verður sett. Grunnstefið er þó komið á vel á veg eftir yfirlegu á samráðsfundi stjórnar með framkvæmdastjórum í byrjun árs.

Fyrir þessum fundi liggur tillaga frá stjórn um breytingu á launakjörum og ég hvet ykkur til að samþykkja þær tillögur ásamt auknu framlagi til fjórðungssambandsins. Hvað varðar launabreytingar, þá er það afar mikilvægt að það sé reynt að koma til móts við þá aðila sem vilja gefa af tíma sínum í þessi mikilvægu verkefni og að það sé metið sem eðlilegt vinnuframlag.

Ég veit að ég hef ekkert náð að fara yfir allt, en ég vil bara þakka fyrir mig að lokum. Starfsfólki og samstarfsfólki í stjórn þakka ég gott samstarf.